



欽定四庫全書

史部  
傳記類  
存目三四

12
130
36

廿六



1152  
1380  
36

欽定四庫全書總目卷六十一

史部十七

傳記類存目三

漢末英雄記一卷 江蘇巡撫探進本

舊本題魏王粲撰粲字仲宣高平人仕魏為丞相掾賜爵關內侯事蹟具三國志本傳案粲卒於建安中其時黃星雖兆玉步未更不應名書以漢末似後人之所追題然考粲從軍詩中已稱曹操為聖君則儼以魏為新朝此名不足怪矣隋志著錄

所錢文  
有鞠那

作八卷注云殘闕其本久佚此本乃王世貞雜鈔諸書成之凡四十四人大抵取於裴松之三國志註為多如水經注載白狼山曹操敲馬鞍作十片事本習見之書乃漏而不載又如築易京本公孫瓚事乃於瓚外別出一張瓚以此事屬之不知據何誤本尤疎舛之甚矣

廣卓異記二十卷

浙江鮑士恭家藏本

宋樂史撰史字正子宜黃人官太常博士直史館事蹟附載宋史樂黃中傳是編前有自序稱唐李

翱卓異記二卷

案卓異記非李翱作史蓋考之未詳謹附訂於此

述唐代

君臣卓絕盛事中多漏錄史初為續記三卷以補其闕後復以僅載唐代未為廣博因纂集漢魏以下迄五代並唐事共為一帙名廣卓異記分為二十卷首卷記帝王次卷記后妃王子公主三卷雜錄四卷至十七卷皆記臣下貴盛之極與顯達之速者十八卷雜錄十九卷舉選二十卷專記神仙之事大抵牽引駁雜譌謬亦多如所稱晉書王導以下至王褒九世皆自有史傳中有儉子仲寶仲

寶子規云云案史仲寶乃王儉字非其子名也儉之子名騫騫之子名規非仲寶子名規也且規子褭附見規傳亦非自有傳諸傳雜見於宋齊梁書及南史亦非全在晉書舛謬殊甚又石勒每更聞鼓鼙聲武士護聞空中言唐公爲天子與夢高祖乘白馬上天之類神怪無稽頗爲蕪雜至引錄傳稱周時尹氏貴盛會食家數千人遭饑荒羅粟作糜吮之吮糜之聲聞於數十里亦不近事理之談其末卷則於自撰總仙記中撮其殊異者入此書

所言不出全家登仙祖孫兄弟登仙及三世四世五世登仙四人六人七人登仙之類重複支離尤不足信自序稱採自漢魏而下而編中乃及楚孫叔敖周尹氏末卷所列神仙并及堯舜之時與序自相矛盾又其小失矣

靖康小雅一卷

江蘇巡撫採進本

不著撰人名氏錄靖康死事之臣傅察种師中王稟劉翊种師道何慶彥黃經臣劉韜李若水徐揆孫傳張叔夜凡十二人宗澤張愨扼於黃潛善汪

伯彥而死者亦附焉澤傳中稱潛善卒不遘死而令公卒則此書作於汪黃秉政之日矣傳末各系以四言詩故以小雅爲名其文散見北盟會編中此本次序似以徐夢莘所載鈔台之非完書也

紹興正論一卷

江蘇巡撫採進本

舊本題湘山樵夫撰不著名氏敘列張浚趙鼎胡銓胡寅連南夫張戒常同呂本中張致遠魏在張絢曾開李彌遜晏敦夫王庶毛叔度范如圭汪應辰許忻方廷寶韓訓陳鼎許時行李光洪皓沈正

卿張燾陳康伯陳括陳剛中三十人皆以不附和議而貶謫者每人之下略具事實少者一二語多亦不過三四行案書錄解題載紹興正論二卷註曰序稱瀟湘野人不著名氏錄文武官不附和議及忤秦檜得罪者又載紹興正論小傳二十卷則樓昉以正論中姓名仿元祐黨傳爲之所謂二卷者似卽此書而書名及撰人之號皆大同小異卷數亦不相符其故則莫得而詳矣

桐陰舊話一卷

編修程晉芳家藏本

宋韓元吉撰元吉字无咎宰相維之元孫以任子  
仕歷龍圖閣學士吏部尚書嘗居廣信溪南自號  
南澗居士此書宋志云十卷陳振孫書錄解題亦  
同續百川學海所錄乃祇此一卷其條數亦與此  
本同蓋全書久佚從諸書鈔撮成編也書中所記  
韓億韓綜韓絳韓繹韓維韓縝雜事共存十三條  
皆其家世舊聞以京師第門有桐木故云桐陰舊  
話蓋北宋兩韓氏竝盛世以桐木韓家別於魏國  
韓琦云

南渡十將傳十卷

兩淮鹽政  
採進本

宋章穎撰十將者劉錡岳飛李顯忠魏勝韓世忠  
張俊虞允文張子蓋張宗顏吳玠也劉岳李魏四  
傳開禧二年表上後六傳未上核以宋史本傳此  
所採摭未爲詳核且抑世忠於勝顯忠後似亦未  
安子蓋宗顏戰功寥寥允文亦僥倖不敗乃與諸  
人竝數皆未免不倫也

稗傳一卷

浙江巡撫  
採進本

元徐顯撰顯仕履無可考觀其稱王良爲鄉里又

稱居平江東城則當爲紹興人而寓於姑蘇者是也  
是編紀元末王艮柯九思陳謙葛乾孫潘純陸友  
王冕王漸楊椿王德元徐文中事後載沈烈婦等  
十三人敘述頗爲詳備中多及丙申二月平江城  
陷事指張士誠軍爲外兵而載己亥紹興被兵事  
於明人則直斥爲寇疑作此書時張氏尙存故其  
詞如此其敘柯九思之卒在至正癸亥案至正紀  
年無癸亥而九思之卒實在乙巳蓋此書傳寫誤  
也

萬柳溪邊舊話一卷

浙江鮑士恭家藏本

元九玘撰玘字君玉號知非子自稱九袞之後不  
知其世次舊本題爲宋人今此書後跋稱玘爲大  
司徒則嘗官戶部尙書又末條稱終慕公不肖仕  
元則當爲元人而卷首題門人張雨填諱則又句  
曲外史之師應在元中葉以後也書中所記皆九  
氏先世事未有玘曾孫實跋稱宏治二十九年於  
祠屋中求得舊本簡斷墨闕不可讀者逾半命門  
人許靈鈔其完者而恨全帙之不可得是此書已

非完本矣元陳世隆載入藝圃搜奇所載之文與此本竝同斷無明人所鈔壞爛之本適與元人所見一字不異者此亦足證藝圃搜奇必非元人書也

旌義編二卷

浙江巡撫採進本

元鄭濤撰濤字仲舒浦江人官太常禮儀院博士鄭氏稱義門自宋建炎初名綺者始至濤為八世先是綺六世孫龍灣稅課提領太和為家規五十八則七世孫欽及其弟鉉增添九十二則共一百

五十則勒之於石至濤復謂禮有當隨時變通者乃酌加增損為一百六十八則列為上卷又彙輯諸家傳記碑銘之文有關鄭氏事實者列為下卷通名曰旌義編宋濂序稱三卷其書實止二卷蓋序文傳寫之誤也

忠傳四卷

永樂大典本

不著撰人名氏載於永樂大典中題云國朝忠傳則明初人所作也其書集古今事蹟各繪圖繫說語皆鄙俚似委巷演義之流殆亦明太祖時官書



歟

草莽私乘一卷

浙江鮑士恭家藏本

舊本題明陶宗儀編宗儀有國風尊經已著錄是書凡錄胡長孺王暉許有壬虞集劉因李孝光金炯楊維禎林清源龔開周仔肩揭傒斯貢師泰汪澤民十四人雜文二十首皆紀當時忠孝節義之作王世貞集有此書跋語云係宗儀手鈔然孫作滄螺集載有宗儀小傳紀所作書目有說鄧一百卷書史會要九卷四書備遺二卷輟耕錄三十卷

無此書名疑好事者依託也

宋遺民錄一卷

內府藏本

不著撰人名氏乃洪武中鈔本毛晉刻之附於忠義集之後或元人所作或明初人所作均未可知後程敏政亦有宋遺民錄殆未見此本故其名相復歟

金華賢達傳十二卷

浙江范懋柱家天一閣藏本

明鄭柏撰柏字叔端浦江人宋濂之門人也是書輯金華一郡人物各為小傳系之以贊凡三百六

十餘人分忠義孝友政事儒學卓行五門亦宋濂  
浦陽人物記之類然如樓照迎合和議曹冠爲秦  
檜門客乃竝取之殊不免鄉曲之私第十一卷內  
又有柏傳一篇附鄭楷之後柏無自作傳之理或  
其家子孫所增入歟

四明文獻錄一卷

浙江范懋柱家  
天一閣藏本

明黃潤玉撰潤玉字孟清鄞縣人永樂庚子舉人  
官至廣西提學僉事事蹟具明史本傳是編成於  
成化丙戌以四明文獻分爲二類一曰鄉先生自

漢角里夏黃公以下三十五人皆四明產也一曰鄉  
大夫自周文種以下九人皆官於四明者也人各  
有傳并系以贊據卷末其孫溥跋蓋原本尙有諸  
人小像後莫息重刊以非真本削除之跋又稱是  
書未出以前有偽本託潤玉之名以行潤玉知而  
燬之其本前無序後無贊云

孝紀十六卷

江蘇巡撫  
採進本

明蔡保禎撰保禎字瑞卿漳浦人是書以孝行事  
實區爲十六類一曰帝王二曰聖門三曰純孝四

曰世孝五日祿養六曰苦行七曰神助八曰通神  
九曰尋親十曰格暴十一曰復仇十二曰死孝十  
三日永慕十四曰瑞應十五曰童孝十六曰女孝

潤州先賢錄六卷

浙江汪啟淑家藏本

明姚堂撰堂字彥容慈谿人正統己未進士官至  
鎮江府知府是編成於天順癸未錄鎮江先賢自  
周迄宋分高風忠節相業直諫德望文學六門列  
其人之事實并後人所為記讚詩文閒及其人之  
著述所載僅二十人不及京口耆舊傳十之一也

忠義錄十四卷

浙江范懋柱家天一閣藏本

明王蕘撰蕘字時禎金谿人景泰辛未進士官至  
浙江按察使是書取史傳忠義之事分類編輯以  
伯夷以下五百九十七人為上張良以下五百七  
人次之各節錄事實有祠墓可考者並詳其地孟  
達等八十七人或失節於前或死不足贖解文卿  
以下十人或事非其主或言非其時皆不以忠義  
與之持論頗正其王克以下一百四人始終一姓  
忠義皎然乃以其為遼金元之臣私意區分曲相

排抑則悖謬甚矣又自謂此書旁搜諸子百家庶  
幾全備而唐宋閒如成三郎蘇安恆韓通張巨輩  
俱未及載則亦未能無所遺漏也

名相贊一卷

浙江范懋柱家  
天一閣藏本

明尹直撰直字正言泰和人景泰甲戌進士官至  
華蓋殿大學士諡文和事蹟具明史本傳是書取  
漢唐宋相業足稱者始蕭何終文天祥凡八十七  
人採摭事實各爲之贊

南宋名臣言行錄十六卷

浙江范懋柱家  
天一閣藏本

明尹直撰此書續朱子名臣言行錄而作前有宏  
治癸亥自序云取宋史列傳自陳俊卿以下芟繁  
節冗撮採其要得百二十有三人然朱子所作名  
臣言行錄原以網羅舊聞蒐載軼事用備史氏之  
採擇若徒鈔錄史文一無考證則宋史列傳具在  
亦何必徒煩筆墨乎

伊洛淵源續錄六卷

浙江巡撫  
採進本

明謝鐸撰鐸有赤城論諫錄已著錄是書所錄凡  
二十一人蓋繼朱子伊洛淵源錄而作以朱子爲

宗主始於羅從彥李侗朱子之學所自來也佐以  
張栻呂祖謙朱子友也自黃榦而下終於何基王  
柏皆傳朱子之學者也然所載張栻等七人則全  
錄宋史道學傳呂祖謙等七人則全錄宋史儒林  
傳李侗等六人略採行狀誌銘遺事其輔廣一人  
則但載姓名里居僅數十字而止尤爲疎略案廣  
卽世所稱慶源輔氏明一統志載其始末甚詳鐸  
偶未考耳明史鐸本傳載其爲南京國子監祭酒  
時上言六事其二曰正祀典乃請進宋儒楊時而

退吳澄爲禮部尙書傅瀚所持僅進時而澄祀如  
故夫澄之學雖曰未醇然較受蔡京之薦者則有  
閒矣鐸欲以易澄蓋以道南一脈之故而曲諱其  
出處也然則是錄之作其亦不出門戶之見矣

宋遺民錄十五卷

副都御史黃登賢家藏本

明程敏政撰敏政字克勤休甯人成化丙戌進士  
官至禮部右侍郎事蹟具明史文苑傳此書前列  
王炎午謝翱唐珏三人事蹟及其遺文而後人詩  
文之爲三人作者並類列焉七卷以後則附錄張

欽定四庫全書  
宏毅方鳳吳思齊龔開汪元量梁棟鄭思肖林德  
暘等八人第十五卷紀元順帝爲宋瀛國公子引  
余應詩袁忠徹記以實之至謂虞集私侍文宗之  
妃說殊妄誕所引亦自相矛盾蓋文宗時嘗下詔  
書稱順帝非明宗之子斥居靜江好事者因造爲  
此言其荒唐本不待辨敏政乃從而信之乖謬甚  
矣

尊鄉錄節要四卷

浙江汪啟淑家藏本

明王弼撰弼黃巖人成化乙未進士官至興化府

知府初謝鐸嘗著尊鄉錄四十一卷載其鄉先達  
事實弼復以己意節其大略取十大儒五大臣六  
忠臣十五孝子各爲之贊卷末附拾遺二十事事  
各爲詩

考亭淵源錄二十四卷

浙江吳玉璣家藏本

明宋端儀撰薛應旂重修端儀字孔時莆田人成  
化辛丑進士官至廣東提學僉事事蹟具明史本  
傳應旂有四書人物考己著錄此編仿伊洛淵源  
錄之例首列延平李侗籍溪胡憲屏山劉子翬白水

劉勉之四人以湖師承之所自次載朱子始末次及同時友人至南軒張栻以下七人次則備列考亭門人自勉齋黃榦以下二百九十三人其二十三卷則門人之無記述文字者但列其名凡八十八人末卷則考亭叛徒趙師雍傅伯壽胡絃等三人亦用伊洛淵源錄載邢恕例也史稱端儀慨建文朝忠臣湮沒乃搜輯遺書為革除錄建文忠臣之有錄自端儀始然其書今未見卽此書原本亦未見世所行者惟應旂重修之本應旂作宋元通

鑑於道學宗派多所紀錄此書蓋猶是意然應旂初學於王守仁講陸氏之學晚乃研窮洛閩之旨兼取朱子故其書目錄後有云兩先生實所以相成非所以相反遂以陸九淵兄弟三人列考亭淵源錄中名實未免乖舛也

鹿城書院集

無卷數 浙江巡撫採進本

明鄧淮撰淮吉水人成化辛丑進士宏治中官溫州府知府以南宋時溫州之士遊二程張朱之門者有周行己等二十三人乃命永嘉知縣汪循卽

鹿城建書院祀二程張朱而以行己等侑焉復輯諸人誌銘家傳及其遺事緒論見於志書語錄中者彙為此編雖亦講學家標榜之書然永嘉學派頗異新安淮不分門戶於其間則視黨同伐異者其公私相去遠矣

吳中往哲記一卷續吳中往哲記一卷續吳中往哲記

補遺一卷

浙江汪啟淑家藏本

吳中往哲記明楊循吉撰續記補遺皆黃魯曾撰循吉有蘇州府纂修志略已著錄魯曾字得之吳

縣人正德丙子舉人循吉書見明史藝文志卷數與此相符記明初蘇州府人物自勲德至冠衲分七目凡四十一人續記自忠節至散逸分十七目凡四十人補遺自審進至釋行分十九目凡三十一人其補遺原目本一卷此本分作二卷又改其釋行第十七為第一則刊刻者之誤也書中所列小傳皆寥寥數言未見端末又如徐有貞以險忮敗而循吉稱為四海物望蓋未免鄉曲之私吳寬位終禮部尚書而魯曾乃題作東閣大學士尤顯



然譌謬則亦不足徵信矣

吳中故實記一卷續記一卷補遺一卷

浙江巡撫探進本

舊本題明楊循吉撰檢勘其文即循吉吳中往哲記黃魯曾往哲續記補遺原本惟於標題中刊去往哲二字易以故實二字蓋書賈剽舊版改易新名以售欺者也

掾曹名臣錄一卷續集一卷

浙江范懋柱家天一閣藏本

明王瓊撰瓊有晉溪奏議已著錄是編乃瓊官南京戶部侍郎時見諸吏中有知琴書可教誨者因

採錄明興以來由掾曹而列名臣者編為此書以示勸勉凡劉敏等九人又續集一卷凡劉本等四人前有正德甲戌瓊自序後有南京戶部郎中卞師敏跋

蘇材小纂六卷

戶部尚書王際華家藏本

明祝允明撰允明字希哲長洲人宏治壬子舉人官至應天府通判明史文苑傳附見徐禎卿傳中是書記天順以後蘇州人物前有自序稱宏治改元詔中外諸司撰集事蹟上史館為實錄簡允明

等數弟子員司其事因私纂紀爲此書第一曰簪  
纓纂徐有貞以下十九人第二曰邱壑纂杜瓊以  
下五人第三曰孝德纂朱顥一人第四曰女憲纂  
王妙鳳以下三人第五曰方術纂張豫等二人大  
約本之碑誌行狀而稍爲考據異同註於本文之  
下其敘徐有貞事頗有諱飾蓋允明爲有貞外孫  
親串之私不能無所假借云

莆陽文獻十三卷列傳七十五卷

福建巡撫  
採進本

明鄭岳編黃起龍重訂岳字汝華宏治癸丑進上

官至兵部左侍郎事蹟具明史本傳起龍萬歷戊  
戌進士竝莆田人是書取莆田仙遊二縣自梁陳  
迄明著作詩文輯爲十三卷又取名人事蹟成列  
傳七十四卷文以體分傳則不分門目後倭變書  
燬起龍爲之重鋟并附柯維騏所作岳傳一首爲  
卷第七十五岳書採摭繁富義例頗仿史裁然起  
龍譏其文內不載楊琅林誠兩御史之奏疏及黃  
仲元之郭孝子祠記墓表傳內載仕梁之徐寅翁  
承贊及永樂初梯榮獻策之林環而於林光朝傳

但紀其文集而不及所著之易解尚書解語錄說詩等書去留不無遺憾則固確論也

東嘉先哲錄二十卷

浙江鮑士恭家藏本

明王朝佐撰朝佐字廷望浙江平陽人宏治丙辰進士官南京工部員外郎是編刻於正德初蒐輯溫州先賢事實分類凡八曰先達曰程子門人曰朱子門人曰名儒曰名臣曰孝子曰氣節曰詞章晉唐以來紀載無考故所錄託始於宋焉

國寶新編一卷

浙江巡撫採進本

明顧璘撰璘字華玉吳縣人宏治丙辰進士官至刑部尚書事蹟具明史文苑傳是書凡錄李夢陽何景明祝允明徐禎卿朱應登趙鶴鄭善夫都穆景暘王韋唐寅孫一元王寵十三人人為之傳傳為之贊蓋感於知交凋謝而作略綴數語以存其人亦柳宗元先友記類也

春秋列傳五卷

副都御史黃登賢家藏本

明劉節撰節字介夫號梅國大庾人宏治乙丑進士官至刑部侍郎是編取春秋內外傳所載列國

諸臣類次行事各爲之傳始祭公謀父終蔡朝吳  
凡二百有二人全本舊文無所考證鄒縣潘榛爲  
之訓釋亦頗疎略

備遺錄一卷

浙江范懋柱家  
天一閣藏本

明張芹撰芹新淦人明史作峽江人蓋新淦其  
試籍也宏治壬戌進士官至浙江右布政使事蹟  
具明史本傳是書紀建文殉節諸臣姓名前有自  
序題正德丙子五月日列四十六人卷中有事實  
者二十人無事實者二十六人案林塾拾遺書云

近見南院御史張芹增入江右數人共五十四人  
塾所見題正德乙亥正此錄前一年而此錄乃轉  
止於四十六人又學海類編有張芹建文忠節錄  
一卷其序與此同亦正德丙子所撰而目次乃與  
此不同且有七十人之多明史藝文志既有張芹建  
文備遺錄二卷又有張芹備遺錄一卷考芹序稱  
錄中四十六人名氏皆閩中宋君端儀嘗採輯爲  
錄而未成者疑芹初據宋氏原本而作後又隨時  
續有增益原非一本傳錄者各據所見遂兩存之

目

拾遺書一卷

浙江范懋柱家天一閣藏本

明林塾撰塾莆田人宏治壬戌進士官至浙江布政司參議此書載建文諸臣事蹟文甚簡略前有正德乙亥自識云考前史失記者凡五十四人故以拾遺名其書然所載與諸書略同其齊泰以下三十人事實俱闕亦未能考補也

台學源流七卷

浙江巡撫採進本

明金賁亨撰賁亨字汝白臨海人初冒高姓正德

甲戌進士題名碑之高賁亨即其人也官至江西提學副使是書敘述台州先儒自宋徐中行迄明方孝孺陳選凡三十八人各為之傳其疑而莫考者又有十五人各以時代類附姓名於傳末其傳雖多採晦菴文集伊洛淵源錄諸書然賁亨當明中葉正心學盛行之時故其說調停於朱陸之間謂朱子後來頗悔向來太涉支離又謂朱子與象山先異後同云云皆姚江晚年定論之說也

新安學系錄十六卷

安徽巡撫採進本

欽定四庫全書總目卷六十一

史部 傳記類存目三

二十

明程瞳撰瞳號峩山休甯人是書以朱子爲新安人而引據歐陽修冀國公神道碑謂程子遠派亦出新安故輯新安諸儒出於二家之傳者編爲此書自宋至明凡百有一人皆徵引舊文以示有據夫聖賢之學天下所公也必限以方隅拘以宗派是門戶之私矣至程子一生無一字及新安而遙遙華胄忽爾見援以例推之則朱出於邾姓源可證今嶧山之土不又引朱子爲鄉黨乎此真爲夸飾風土而作不爲闡明學脈而作也江南通志列

瞳於儒林傳中稱所著新安學系與朱子合者存背者去足盡是書之大旨矣

二科志一卷

江蘇巡撫採進本

明閻秀卿撰秀卿蘇州人始末未詳是書分文學狂簡爲二科所載自楊循吉以下凡七人皆偶錄一二事不爲全傳蓋一時互相標榜之書其紀徐禎卿方登賢書於文徵仲尙稱文璧而以徵明字之則猶宏治中所作也

明璫彰瘕錄一卷

兩淮鹽政採進本

欽定四庫全書總目卷六十一

史部 傳記類存目三

三

明顧爾邁撰爾邁淮安人始末未詳是書採撮實錄憲章錄中官考諸書而各加論斷所記止成化中汪直擅政之事似非完本抑或於世近者有所諱歟

革朝遺忠錄二卷

浙江范懋柱家天一閣藏本

明郁袞撰袞嘉興人其書撰述年月無可考黃佐革除遺事已稱因郁袞原本則當在正德以前矣所列一百六十傳皆明憲帝時死難諸臣而附錄一卷則降燕諸臣如胡廣黃福之類後至大官者

亦在焉每傳後或附以贊語又間有所附註然其精要已皆採入革除遺事中矣

別本革朝遺忠錄二卷

兩江總督採進本

不著撰人名氏惟題青州府知府杜思子睿重刻思卽撰考信編者也黃虞稷千頃堂書目於郁袞革除遺忠錄二卷外又別出杜思革朝遺忠錄二卷蓋卽指此本然以郁袞本校之則此錄實郁袞書惟袞於各傳後附以贊語而此本有傳無贊爲少變其例又書首冠以張芹備遺錄黃佐革除遺

事敖英備遺續錄序三篇皆與書不相應世別有高廩刊本卷首亦有三序與此正同蓋明代刊書者往往竄亂舊本而沒所由來諸版競出混淆彌甚其風熾於萬歷以後今觀此本則嘉靖中已有之矣

案思登嘉靖丙辰進士

羣忠錄二卷

浙江汪啟淑家藏本

明唐龍撰龍有易經大旨已著錄是編紀明太祖征陳友諒時諸臣姓名行實凡祀於餘干縣康郎山廟者有丁普郎等三十五人祀於南昌府廟者

有趙得勝等十四人又附載孫燧等五人皆殉宸濠之難後賜祀於旌忠祠者其題旌各疏并祭謁詩文亦附於後焉

崑山人物志十卷

浙江巡撫採進本

明方鵬撰鵬字子鳳亦字時舉崑山人正德戊辰進士官至太常寺卿是書論次崑山先哲首名賢六人次節行二十八人次文學三十七人次列女三十人次藝能三十一人次游寓二十六人而以雜志終焉其為十卷明史藝文志作八卷傳寫誤



也

名臣言行錄前集十二卷後集十二卷 浙江范懋柱家天一閣藏本

明徐咸撰咸海鹽人正德辛未進士官至襄陽知府先是豐城楊廉本彭韶名臣錄贊撰名臣言行錄四卷所載凡五十五人咸亦纂近代諸臣言行錄凡四十八人餘姚魏有本官河南巡撫時嘗合刻之及咸歸里之後病其未備重為纂輯於楊錄增十六人於已所錄者亦增二十五人分為前後二集自為序記其始末而仍以魏有本初刻之序

弁於書首云

毘陵忠義祠錄四卷附錄一卷 江蘇巡撫採進本

明葉夔撰夔字司韶武進人成化中以歲貢生官汝陽州訓導是編第三卷中載夔請祀典書稱宋德祐元年十一月巴顏率師攻常州屠其城知府事姚訢通判陳炤俱不屈死其先後殉難者又有王安節劉師勇胡應炎尹玉麻士龍包圭阮應得方允武徐道明莫謙之僧萬安諸人自成化九年郡庠生段瑜等建言於同知柳某始立訢炤以下

木主十一位附於陳司徒廟而文天祥劉師勇阮應得僧萬安猶未與也宏治十年知府曾望宏乃別創忠義祠請竝祀文天祥以下十四人而附以元壬辰靖難之劉溶巡按御史謝琛亦上書請著於祀典詔從之夔因編其始末爲此書首圖考次傳志次詩次贊次文牒凡史傳所未載者此皆補其佚闕足相參證惟此書載宋臣與祀者止十四人則未祀文天祥等四人其附於陳司徒廟者止當有十主耳夔請祀典書云十一主未喻其故又

考宋季三朝政要載元兵至常州守臣王宗洙遁權守王良臣以城降今是書姚崇傳中謂良臣屢舉不第流落無藉寓常與錢闔謀竊符印詐稱郡官詣巴顏軍前獻之然則良臣未嘗權守三朝政要誤書矣是亦足訂史之譌也此書作於正德初年末附錄一卷載

國朝順治十四年事蓋後人所續其姓名則不可考矣

毘陵人品記四卷

浙江范懋柱家天一閣藏本

欽定四庫全書總目卷五十一

史部 傳記類存目三

三五

明葉夔撰其子金及同邑毛憲續成之憲有諫垣  
奏草已著錄金字誠齋刻是書時官紹興府通判  
其終於何官則未詳也是書前有自記稱常州古  
毘陵地記人品冠以古名者古可以統今今常州  
之名隋唐以前未有也然隋唐以前無常州不可  
繫以常州隋唐以後無毘陵獨可繫以毘陵乎至  
其先列五縣沿革於前使歷代殊名瞭如指掌則  
提綱挈領固體例之最善者也其書敘述頗簡核  
然皆史傳所已載未附夔憲二小傳則嘉靖壬寅

刻是書時餘姚岑原道所補見原道所作序中

毘陵正學編一卷

兩江總督  
採進本

明毛憲撰是編所載凡十二人首楊時次鄒浩周  
孚先周恭先唐彥思鄒柄喻樗胡珪尤袤李祥蔣  
重祥謝應芳自浩以下或籍晉陵或籍宜興或籍  
無錫或籍武進獨時爲劍州將樂人於毘陵爲流  
寓蓋以道南一脈假借之以爲重云

名臣像圖一卷

浙江鄭大  
節家藏本

明吳守大撰守大字有君崑山人是書成於正德

丙子錄徐達以下至楊繼宗凡四十九人人繪一

圖圖後各叙仕履系之以贊其書刻於廣西紙版

拙惡四十九人面貌相同惟以題名別識殆如兒

戲

畜德錄一卷

浙江范懋柱家天一閣藏本

明陳沂撰沂有維楨錄已著錄此書皆紀宣德正

統閒名臣言行人各一二條末有嘉靖壬辰自跋

稱以所聞於外祖金靜虛太常夏崇文及吳文定

李文正者著之於篇雖有不倫而取善之道不以

人廢云云考所載如于謙魏驥徐晞王翱姚夔岳

正韓雍周忱劉大夏屠墉章懋儲嚨何瑋朱希周

等皆一時名人他如蹇義解縉夏原吉楊榮金幼

孜身事兩朝已為其次至王越以權術用事益為

物論所不滿所云不倫者殆即指數人而言歟趙

汝愚編名臣奏議丁謂秦檜竝以章疏見收朱子

編名臣言行錄王安石呂惠卿亦得以姓名同列

蓋定千秋之品則隻字不可誣取一節之長則片

善亦可錄竝瑕瑜不掩具有前規然奏議為論事

之文苟所論關國計之得失繫民生之利病言之當理行之有裨自未可以出自僉壬遂削不錄至於採前言往行矜式後人自當仰溯名賢用垂規矩固未可委曲遷就使有所濫廁於其閒矣

廣州人物傳二十四卷

浙江范懋柱家天一閣藏本

明黃佐撰佐有泰泉鄉禮己著錄是書採自漢迄明廣州人物之散見諸書者以類區分各爲之傳共一百五十餘人

建甯人物傳四卷

浙江巡撫採進本

明李默撰默字時言甌甯人正德辛巳進士官至吏部尙書兼翰林學士爲趙文華誣陷下詔獄瘐死萬歷中追諡文愍事蹟具明史本傳是書專記建甯人物起唐建中迄明景泰凡四百十七人以諸邑分載而一邑之中又以時代爲先後每條之下各註所引原書自唐書南唐書五代史宋史而外大抵皆本之舊志未爲信史疎略之處尤多如謂吳棫爲處士而述所著書惟及韻補則舛漏可知矣

紀善錄一卷

浙江范懋柱家天一閣藏本

明杜瓊撰瓊字用嘉吳縣人以孝聞知府況鍾兩薦之固辭不出自號鹿冠老人是書皆載吳中循吏先賢其列女有操行可紀者亦竝見焉自洪武迄正統凡四十人蓋隨所見聞錄之故多節取一事不爲全傳亦表微闡幽之意也

三家世典一卷

左都御史張若淮家藏本

明郭勛撰勳營國威襄公郭英六世孫襲封武定侯正德中奉命鎮兩廣因輯中山王徐達黔甯王

沐英及其家世系履貫勳閱遭遇本末爲此書大抵本實錄國史於事蹟無所增益考英在諸功臣中猶居其次以配二王似乎尚非其倫自明以來亦無徐沐郭三家竝稱之說也

淮郡文獻志二十六卷補遺一卷

兩淮馬裕家藏本

明潘墳撰墳字伯和山陽人正德戊辰進士官至右副都御史巡撫河南事蹟具明史本傳是書前有自序謂自春秋以來至明正德上下數千年德業文章會於一書今考其書摭摭陳編未見決擇

欽定四庫全書總目卷六十一

史部 傳記類存目三

三九

其最謬者至收入宋龔開所作宋江等三十六人之贊此何關於文獻耶

祥符鄉賢傳八卷

兩淮鹽政探進本

明李濂撰濂字川父祥符人正德甲戌進士官至山西按察司僉事事蹟具明史文苑傳是編以祥符縣志所載人物僅有名氏而行實未詳乃一一稽考自明初至於嘉靖得二十九人撰其事蹟附以論贊又安然馬昂張泰三人自祥符移籍他方者竝附列焉從唐書所載士大夫遷徙四方者俱

標其舊貫之例也

祥符文獻志十七卷

兩淮鹽政探進本

明李濂撰濂於嘉靖壬寅嘗輯祥符鄉賢傳其後二年甲辰又推廣前所未載及其人之履歷梗概略存者輯爲此書每人每條之下皆註出某碑某傳某集蓋倣名臣言行錄之例每傳之後或偶附錄詩文則濂之變例也所錄皆明一代之人而至於盈十七卷時彌近則易詳亦時太近則易濫固志乘之通病耳

金華先民傳十卷

浙江巡撫  
採進本

明應廷育撰廷育字仁卿永康人嘉靖癸未進士官至按察司僉事是書取金華歷代人物自漢迄明各為之傳分道學名儒名臣忠義孝友政事文學武功隱逸雜傳為十類自正史外竝參以諸家文集及家狀碑記於每傳之下各註明用某書蓋仿金履祥通鑑前編之例所據舊籍共四十餘種而其大概則本諸敬鄉錄賢達傳金華府志三書云

國琛集二卷

浙江汪啟淑家藏本

明唐樞撰樞有易修墨守己著錄是書紀明初以來迄於嘉靖人物大旨以聖人君子善人有恆分為四科不以時次不以類從錯出雜陳上自宰輔下至隸卒人各一小傳寥寥數語殊不詳備傳後閒附以論斷然亦不定其孰為聖人君子孰為善人有恆體例尤不分明其曰國琛集者蓋取國家以人為寶之意前有王畿序并樞自序樞學宗良知故於王守仁推崇甚至云



閩學源流十六卷

兩淮馬裕家藏本

明楊應詔撰應詔建安人嘉靖辛卯舉人是書歷載楊時以後諸儒終於蔡清各誌其言行詳其傳授凡百九十五人

道南源委錄十二卷

浙江巡撫採進本

明朱衡撰衡字士南萬安人嘉靖壬辰進士官至工部尚書兼副都御史總理河漕事蹟具明史本傳此書乃其視學閩中時錄道南源委以示諸生託始於楊時附以游酢王蘋凡閩士之浴波而起

者則載焉明代惟錄陳真晟周瑛黃仲昭蔡清四人蓋時代既近其餘尙未論定云

東吳名賢記二卷

江蘇巡撫採進本

明周復俊撰復俊字子籲崑山人嘉靖壬辰進士官至南京太僕寺卿是編記吳中名賢自商相巫咸至明太常寺卿魏校凡四十七人各爲之傳贊附傳者又十人前有自序歷舉所載諸賢而議論之蓋略仿華陽國志之體然所紀簡略未足以資考證也

列卿紀一百六十五卷

浙江巡撫  
採進本

明雷禮撰禮有六朝索隱已著錄是書臚列明代職官姓名起自洪武初終於嘉靖四十五年凡內而內閣部院以至府司寺監長官外而總督巡撫皆以拜罷年月為次上標人名而各著其出身里籍於下為年表又於年表之後附載其居官事蹟為行實年表但以次題名不用旁行斜上之例行實略仿各史列傳而又不詳具始末止書其事之大者而已惟第八卷至十三卷為內閣行實頗

為詳備論斷亦多持公道如謂解縉等盡忠納誨而責其不能死建文之難謂陳山存心險刻臨事乖方明史頗採之獨史謂陳文猥鄙無所建白而禮稱其政體多達勳德未昭文廬陵人與禮同鄉蓋曲徇桑梓之心非公論矣

內閣行實二卷

兩淮馬裕  
家藏本

不著撰人名氏亦無序跋所載僅解縉黃淮胡廣胡儼楊士奇楊榮金幼孜張英陳山楊溥陳循高穀苗衷馬愉曹鼎十五人今核其文與雷禮列卿

紀中內閣行實竝同蓋書賈取不完之本改其目錄以售欺併削去禮名使若別一人所著者其作偽頗巧然禮原本具在何可誣也

善行錄八卷續錄二卷

內府藏本

明張時徹編時徹字維靜鄞縣人嘉靖癸未進士官至南京兵部尚書明史附見張邦奇傳此書獵採史傳取先哲行誼之高者萃次成編正編起春秋至明代凡二百九十人續編起漢迄宋凡一百四十五人

義烏人物志二卷

浙江范懋柱家天一閣藏本

明金江撰江字孔殷義烏人是書成於嘉靖乙未取史傳地志及諸家文集中所載義烏名人各為之傳贊所載凡四十七人分忠義孝友政事文學四類蓋全倣宋濂浦陽人物記例而敘述過於簡略不及濂書博贍也

濟美錄四卷

兵部侍郎紀昀家藏本

明鄭燭編燭歙縣人是編成於嘉靖乙未蒐錄其祖元歙縣令鄭安休甯令鄭千齡徵授翰林待制

鄭玉歙縣令鄭璉國史郡志諸傳及制誥公牒誌狀之屬人爲一卷千齡安之子玉璉皆千齡之子也前有黃訓序稱玉之死節由守徽之將見之不以其禮使見之以禮可以無死前乎先生有箕子焉云云其說至謬民生于三事之如一臣不二心天之經也豈敵國謬爲恭敬遂可叛君父而從之乎如訓所云是玉非爭名節而死乃爭禮貌而死也蓋自講學風熾儒者類以傳道爲重但能註太極圖解近思錄卽爲有功於世道而綱常大義視

若末務焉訓之此說其亦浸淫於習俗而不自覺歟

逸民傳二卷

浙江巡撫採進本

舊本題明少元山人皇甫洵撰考明史藝文志載皇甫濂逸民傳二卷江南通志亦同則舊本傳寫誤也濂字子約一字道隆長洲人嘉靖甲辰進士除工部主事謫河南布政司理問稍遷興化同知明史文苑傳附見其兄洵傳中是編採歷代逸民事迹人各爲傳起晉孫登迄宋林逋凡百人其去

取義例不甚可解如鄧郁一傳乃純述白日冲舉之事則葛洪神僊傳以下何可勝收其他表表在耳目者乃或不載殆偶然寄意不求詳備如皇甫謐高士傳例歟即其託始於晉亦似續謚書也中庾易明僧紹二人有錄無書其為傳寫者佚之為當時失於檢校則均不可知矣

元祐黨人碑考一卷

編修程晉芳家藏本

明海瑞擢瑞字汝賢號剛峯瓊山人由舉人官至南京右都御史諡忠介事蹟具明史本傳案元祐

黨人碑載於李心傳道命錄馬純陶朱新錄者互有異同茲則專以道命錄為主其闕者則以他書補之故所錄人數較他書為多如曾任執政之黃履張商英蔣之奇曾任待制之張畏岑象求周鼎以下十餘人皆他本所未載者搜羅可謂博矣至所附慶元偽學黨籍與他書無所同異固不及永樂大典所載慶元黨禁之詳備也

續吳先賢贊十五卷

浙江吳玉樞家藏本

明劉鳳煥鳳字子威長洲人嘉靖甲辰進士官至

河南按察使僉事鳳所撰述刻意奧僻或至於餽  
釘堆積晦昧詰屈不可句讀是編論贊亦復如是  
所錄皆明人自六卷以前不分門目七卷以下分  
節義死事孝友儒林文學辟命隱逸藝事道術寄  
寓十門自序謂自節義以上不爲題目者所以效  
於用亦各因時或未可以概之也然開卷卽爲高  
啟概以文學有何不可總之好怪而已矣

羣忠備遺錄二卷

江蘇巡撫  
採進本

明羅汝鑑撰汝鑑字明夫新喻人是書記建文殉

節諸臣事迹大致本張芹備遺錄鄭禧羣忠事略  
而稍附益之遂合兩書以爲名所錄凡八十有四  
人每傳後附尹直謝鐸何孟春敖英陳建諸論其  
稱外史氏者則汝鑑所自作也其書初刻於楚雄  
前有嘉靖辛亥自序後十年庚申以校讎未精復  
增入數人而重刊之見卷末自識中

宋五先生郡邑政績一卷

浙江范懋柱家  
天一閣藏本

明李貴撰貴字廷良豐城人嘉靖癸丑進士改庶  
吉士貴先嘗編次程明道郡邑政績一卷此復增

欽定四庫全書總目卷六十一

史部 傳記類存目三

三七

入周張朱陸四子涖民之事合爲一書然皆史傳  
文集所已載無庸貴之表章也

碩輔寶鑑要覽四卷

浙江巡撫  
採進本

明耿定向撰定向字在倫麻城人嘉靖丙辰進士  
官至戶部尙書總督倉場諡恭簡事蹟具明史本  
傳定向以講學著論史本非所長此書乃其爲南  
直隸督學御史時所作上述虞夏下逮唐宋得輔  
相之賢者七十九人各爲讚述議論亦多膚淺其  
卷首論臯陶一條引陸九淵之言則其生平宗

旨所在也

守令懿範四卷

直隸總督  
採進本

明蔡國熙撰國熙永年人嘉靖己未進士官至山  
西提學副使是編乃其官蘇州府知府時輯古來  
守令事迹自周至元分儒牧循牧二類儒牧自子  
游而下三十人循牧自公孫僑而下一百一十人  
前有皇甫汭序稱儒可以包乎循而循未必皆合  
於儒體用之間蓋有辨焉云云夫儒者之學明體  
達用道德事業本無二源岐而兩之殊爲偏見且

唐韓愈宋歐陽修所學不甚相遠而列愈於儒牧  
列修於循牧亦不知其以何而分楊簡傳陸氏之  
學黃震傳朱子之學所著之書釐然具在乃升簡  
於儒牧以繼陸氏而不升震於儒牧以繼朱子豈  
非未見日鈔耶循名失實尊儒而不知所以尊徒  
成其門戶標榜而已

樵李往哲前編一卷

浙江巡撫  
採進本

明戚元佐撰元佐字希仲嘉興人嘉靖壬戌進士  
官至尙寶司卿是編取洪武至萬歷初年嘉興前

哲自程本立以下共十四人各爲一傳王世貞爲  
之序其稱前編者則以

國朝項玉筍有續編之刻追題此名也

古今廉鑑八卷

江蘇巡撫  
採進本

明喬懋敬撰懋敬字允德上海人嘉靖乙丑進士  
官至湖廣右布政使是書所載自春秋季文子至  
明楊繼盛皆以清操傳於世者亦宋人廉吏傳之  
類而鈔撮大略挂漏尙多前有萬歷戊寅自序自  
稱其官爲閩封人乃其宦閩時所輯也



莆陽科第錄二卷

浙江巡撫採進本

明吳爵編爵湖南甯鄉人嘉靖中官福建興化府訓導因錄興化一郡科第自洪武庚戌至嘉靖己酉其爵里亦皆縷載前有郡人鄭岳序後有爵自跋

懷忠錄

無卷數 浙江范懋柱家天一閣藏本

明鄭應旂撰應旂莆田人嘉靖中貢生是編前七卷皆應旂咏靖難諸人詩賦騷詞後為革朝遺忠列傳不分卷數每傳後附引諸家記載詩文以證

之略似名臣言行錄之體凡四十篇而以外錄補錄終焉大致與黃佐革朝遺事相仿

吳興名賢續錄六卷

江蘇巡撫採進本

明王道隆撰道隆字容山烏程人其書分道學儒行文藝勳業宦績孝友節義流寓隱逸名宦十門各敘其事實系以論贊其名宦一門採摭最廣頗足補志乘之闕然烏程潘季馴以治河功績為明代名臣應列勳業錢鎮經史皆有著述應列儒行今具錄其同時同邑之人而二人獨不見收未免

疎漏至如敘蔣瑤而不載其陳時弊七事敘張永明而於永明改左都御史後一切整飭臺綱諸政績悉置不錄亦爲脫漏云

桐彝三卷

浙江巡撫探進本

明方學漸撰學漸字達卿號本菴桐城人以子大鎮貴贈大理寺少卿是編取其鄉忠孝義烈之行凡耳目所及者各爲立傳自序謂風世莫如彝充彝莫如學故以桐彝爲名凡五十人爲傳二十三篇

靖難功臣錄一卷

左都御史張若淮家藏本

不著撰人名氏黃虞稷千頃堂書目有此書而闕其卷數此本爲明嘉靖中魯藩宗人當澗編人明朝典故者祇此一卷未知爲完書否也所載姚廣孝李友直譚淵朱能張玉武勝顧成李彬孫巖陳珪劉中孚徐忠薛祿陳賢陳瑄吳中金忠徐增壽凡十八人後又附以封爵名數凡三十四人敘述簡略不足以資考證也

貧士傳二卷

內府藏本

欽定四庫全書總目卷六十一

史部 傳記類存目三

四

明黃姬水撰姬水字瀄父吳縣人黃省曾之姪也  
是編載自周至明初貧士七十五人各爲之贊漏  
略殊甚至如莊周貸粟監河侯一事亦列之貧士  
中尤不倫也

崑山人物傳十卷名宦傳一卷

浙江鮑士  
恭家藏本

明張大復撰大復字元長崑山人與歸有光同時  
是書舊本題曰梅花草堂集而以崑山人物傳崑  
山名宦傳爲子目蓋皆編入集中故總以集名實  
則各一書也先是方鵬有崑山人物志六卷此則

斷自明代起洪武至萬歷得三百餘人其間父子  
祖孫以類附傳略如史體又於官是士者取十五  
人爲名宦傳附之敘述尙爲雅潔而詞多揚詡亦  
不免標榜之習其名宦傳別有鈔本題曰玉峯名  
宦傳析爲二卷佚其中王南昌傳一篇僅有十四  
人又佚其論尾數行蓋傳鈔脫漏不及集本之完  
整也

欽定四庫全書總目卷六十一

番禺潘壽彭初校  
番禺陳慶修覆校

欽定四庫全書總目卷六十一

史部 傳記類存目三

四三

欽定四庫全書總目卷六十二

史部十八

傳記類存目四

歷代相臣傳一百六十八卷

直隸總督  
採進本

明魏顯國撰顯國字汝忠南昌人隆慶丁卯舉人  
是書明史藝文志著錄卷數與此本相合大抵全  
鈔史傳原文無所褒貶亦無所考正所敘歷代相  
臣職名如南朝制一條以梁初罷相國置丞相罷  
丞相置司徒後又置相國位列丞相上不知置相

國列丞相上乃陳制非梁制又謂唐魏徵以祕書  
監參預朝政始有參議得失參知政事之名不知  
其時先以吏部尚書杜淹參議朝政故有是名又  
謂開元以後宰相爲鹽鐵轉運延資庫使名尤不  
正不知其時以宰相兼攝是官非以是官爲宰相  
況其時太微宮使太清宮使多以宰相兼之不僅  
延資庫使也又以李光弼列於宰相不知光弼爲  
河中節度惟加平章不治政事乃唐之使相唐末  
節度加侍中中書令三公三師者甚多皆使相非

宰相載於史志者甚詳元之參議中書省事乃六  
曹管轄官止四品亦非宰相故元史宰相表不列  
是官又元制三公非相職故別立三公三師表今  
俱列於宰相舛譌旣甚挂漏尤多至於各史宰相  
列傳或採或置茫無義例更未免踈脫矣

儒林全傳二十卷

浙江汪啟淑家藏本

明魏顯國撰所錄自孔子至元吳澄皆採錄前史

與相臣傳同

歷代守令傳二十四卷

兩淮馬裕家藏本

欽定四庫全書總目卷六十二

史部 傳記類存目四

二

明魏顯國撰自宓不齊仲由至劉秉直為歷代循吏二十一卷又自郅都至敬羽為歷代酷吏三卷於史傳原文之外閒有所增而亦多蕪雜

元相臣傳十二卷

兩淮鹽政採進本

明魏顯國撰其書紀元代丞相自耶律楚材至布

延巴哈

原作普顏不花今改正

二十六人各自為傳全襲元

史之文未嘗別有蒐討又前後凌亂脫誤如元史

宰相表載安圖

原作安童今改正

為右丞相始世祖至元

二年乙丑訖於二十七年庚寅布呼密

原作不忽荒今改正

為平章政事始至元二十八年辛卯訖成宗元貞二年丙申是布呼密後於安圖凡二十七年此書列布呼密於安圖前殊為倒置又如世祖庚申元年王文統趙璧為平章政事尤在史天澤諸人之前其相業俱見本傳而此書均汰之蓋不特於正史之外無所徵引且於正史之中亦多所挂漏矣

忠節錄六卷

浙江巡撫採進本

明張朝瑞撰朝瑞字子禎海州人隆慶戊辰進士官至南京鴻臚寺卿朝瑞以宋端儀革除錄至郎

欽定四庫全書總目卷六十二

史部 傳記類存目四

三

瑛萃忠集記遜國諸臣事者凡十七家互有舛漏因輯此書載當時瀚雪之旨於卷首明非私撰自第一卷至第五卷記徐輝祖以下凡一百六十三人附錄十六人以官階爲敘不分差等第六卷曰考誤如辨建文於天順中由滇至京唯太監吳亮識之當時三楊皆其舊臣不應僅一吳亮能識舊主而建文時年六十四亦不得有九十餘歲其考證最爲明確所列十七家書外尙有高璧之幽光錄陸時中之逸史姜清之祕史王會之野史袁褰

之奉天刊賞錄諸書朝瑞未及蒐考然大概已備於此矣

吳中人物志十二卷

浙江巡撫採進本

明張景撰景字景春長洲人是編成於隆慶庚午所輯吳中人物上自成周迄於明代分孝友忠義吏治薦舉宦蹟儒林文苑閭秀逸民流寓列仙方外十二門各系以論贊同郡皇甫沆爲之序吳中人物自王賓楊循吉祝允明朱存理等遞有撰述此本因而廣之較諸家稍備然事皆不著出典未

免無徵不信也

輔世編六卷

江蘇巡撫  
採進本

明唐鶴徵撰鶴徵有周易象義已著錄是書取明代諸臣次其行事起洪武初李善長劉基訖嘉靖中曾銑胡宗愈凡五十二人崇禎閒其門人陳睿謨巡撫湖廣爲評校刊版其敘稱戎務孔亟之時輒取名臣傳略倣其行事多得變通之法閒嘗鈔書有得多與我師凝菴唐先生輔世編合者因綜其成彙翼以己意勒成一書則是編已不盡鶴徵

原本矣其所採諸人事實多主戰略蓋睿謨身在戎行意切時用有所爲而爲之者也

聖門人物志十二卷

江西巡撫  
採進本

明郭子章撰子章有蟻衣生易解已著錄是書則子章官晉陽時所輯凡遊於聖門與私淑而得從祀廟廡者各爲之小傳附以贊論首孔子世家次先賢次先儒而以有明之會典祀儀終焉其中雜以周汝登羅汝芳諸人之論其時心學橫流故子章多主張其說孟子傳論謂孔子之學以從心

欽定四庫全書總目卷六十一

史部 傳記類存目四

五



所欲不踰矩爲的顏子從之末由而孟子云能者從之又云心之官則思卽孔子從心之旨猶主持門戶之見也

豫章書一百二十二卷

江西巡撫探進本

明郭子章撰是書蓋江西之總志全用史體爲之分大記二十卷志二十二卷表十卷事紀二卷列傳六十八卷前無序而有總目其總目以爲列傳六十六卷刊本誤也其體例蓋本諸華陽國志然冗雜太甚去常璩所撰遠矣

國士懿軌十卷

浙江巡撫探進本

明余養蒙撰養蒙臨海人自序謂稟大中丞耿公之命而爲之者案明史耿定向傳弟定力隆慶辛未進士官至南京兵部右侍郎時方爲南京都御史故稱大中丞也書前有定力序復有諭官屬文一首大旨以當時專重科目名實不副故取古今來士子出於太學及以貴郎起家者自列國迄明初凡一百二十七人刪節諸史及志乘各爲之傳意欲以矯偏重之弊然舉一代之進士概以籠鷹

欽定四庫全書總目卷六十二

史部 傳記類存目四

六

檻駒目之殊不免於矯枉過直矣

春秋名臣傳十三卷

浙江汪啟淑家藏本

明姚咨撰咨字舜咨無錫人初其邑人邵寶為是書未畢咨續成之始於周之辛伯迄於虞之宮之奇凡一百四十八人傳末各附以小讚大旨與宋王當春秋列國臣傳相出入而其義例乃譏當書用魯史編年之非然既標以春秋則自應用春秋之年月若各從列國轉致錯互難明以是議當未為允也

戰國人才言行錄十卷

浙江范懋柱家天一閣藏本

明秦瀚撰瀚無錫人是書成於隆慶中類次戰國人物起魏文侯迄荆軻凡一百四十九人皆鈔錄戰國策史記之文而稍刪節之

鎮平世系記二卷

浙江范懋柱家天一閣藏本

明朱睦㮮撰睦㮮有易學識遺已著錄永樂元年封周定王第八子有曠為鎮平王睦㮮其六世孫也以明代玉牒於正德以後多略遂纂述有曠以下八世支派以成此書前曰例義次世系次世傳

欽定四庫全書總目卷六十二

史部 傳記類存目四

七

次內傳次述訓

江右名賢編二卷

浙江巡撫採進本

明喻均劉元卿同撰均新建人隆慶戊辰進士官至按察使副使元卿有易大象觀已著錄萬歷中巡按江西御史臨清陳大夔議修通志因先欲輯名賢一門屬均與元卿司其事分名臣節義理學忠諫方正清介隱逸儒行治功文學孝友十一目所紀凡二百四十有八人門類太多頗涉瑣碎又所載有明一代人物尤為泛濫前有巡撫都御史邊維

垣及大夔序後有元卿序元卿謂理一而已安得紛紛區目則知分目冗複出於均意即元卿亦心非之矣

宗譜纂要一卷

安徽巡撫採進本

明王應昌撰其子鏊續成之應昌字亮之岷縣人萬歷癸酉舉人鏊字長穎人

國朝官上海縣知縣是書敘歷代理學源流分開天一世祖承天第一宗達天第一宗翼天第一宗標目已近乎二氏至以荀卿揚雄與孔子竝列尤為

失倫其分載諸儒支派大率與黃宗羲明儒學案相出入蓋為門戶而設不為學問而設也

貂璫史鑑四卷

兩淮鹽政採進本

明張世則撰世則諸城人萬曆甲戌進士官至四川安縣兵備副使是書嘗於萬曆二十年進呈得旨下禮部禮部覆疏附焉書凡六條一曰主君首載明太祖禁抑內臣不得干預外事然後敘歷代寵閹之弊二曰弼臣載歷朝相臣與宦寺離合之迹三曰奸範載閹之賢者四曰媼戒載閹之惡者

五曰國祚載秦漢以來寺人之尤能亂國者六曰沿革則闡宦職官志也宦寺賢者萬中不得一二世則方指陳炯戒將以啟迪君心而所列奸範一條如勃鞞之斬祛繆賢之薦士裴寂之宮人私侍高力士之贊立太子皆目為佳事殊多謬戾又列及明代寺人而以阮安預其閒益不可訓矣

聖學宗傳十八卷

兩淮馬裕家藏本

明周汝登編汝登字繼元又字海門嵯縣人萬曆丁丑進士官至南京尙寶司卿明史儒林傳附載

王畿傳末稱王守仁傳王良良傳徐樾樾傳顏鈞鈞傳羅汝芳汝芳傳楊起元及汝登起元清修姱節然其學不諱禪汝登更欲合儒釋而會通之輯聖學宗傳盡採先儒語類禪者以入蓋萬歷以後士大夫講學者多類此云云卽此書也首載黃卷正系圖其序自伏羲傳至伊川程子下分二支一支朱子以下不系一人一支則陸九淵之下系以王守仁并稱卷是圖信陽明篤敘統系明與聖學宗傳足相發明云

歷朝璫鑑四卷

編修汪如藻家藏本

明徐學聚撰學聚字敬輿蘭谿人萬歷癸未進士官至副都御史巡撫福建是編輯錄歷代宦官事蹟自周秦以迄於明分善可爲法惡可爲戒二種而於明代紀載尤詳第所錄僅至世宗朝而止則仍不免有所避忌又元李邦甯卽嘗入太學代祀孔子至大風滅燭之異者其狂妄可知乃入之善可爲法中進退亦未甚允也

鹽梅志二十卷

內府藏本

明李茂春撰茂春字蔚元杞縣人萬歷癸未進士  
是編採取歷代賢相嘉言善行錄成一編始於臯  
陶終於范純仁凡六十六人

漢唐宋名臣錄五卷

兩江總督  
採進本

明李廷機撰廷機字爾張晉江人萬歷癸未進士  
官至禮部尚書東閣大學士諡文清事蹟具明史  
本傳是書所錄自漢文翁至宋杜衍凡六十人黃  
吉士序謂其錄取嚴而用意微蓋借以諷勸當時  
廷臣有爲而發故不求全備云

栖真志四卷

浙江巡撫  
採進本

明夏樹芳撰樹芳字茂卿江陰人萬歷乙酉舉人  
是編取周秦至元代之修真栖靜者各詳其事蹟  
陳繼儒爲之序其中時代頗顛舛至於江淹謝靈  
運李賀歐陽修蘇軾黃庭堅秦觀朱子諸人凡談  
論詞章語意偶類釋老者卽引而入志尤牽合不  
倫

獻徵錄一百二十卷

浙江巡撫  
採進本

明焦竑撰竑有易鑒已著錄是書探明一代名人

欽定四庫全書總目卷六十二

史部 傳記類存目四

十二

事蹟其體例以宗室戚畹勳爵內閣六卿以下各官分類標目其無官者則以孝子義人儒林藝苑等目分載之自洪武迄於嘉靖蒐採極博然文頗泛濫不皆可據又於引據之書或註或不註亦不免疎略考竝在萬歷中嘗應陳于陛聘同修國史既而罷去此書殆卽當時所輯錄歟

熙朝名臣實錄二十七卷

浙江巡撫探進本

明焦竑撰此書明史藝文志不著錄前有自序謂明代諸帝有實錄而諸臣之事不詳因撰此書自

王侯將相及士庶人方外緇黃僮僕妾伎無不備載人各爲傳蓋宋人實錄之體凡書諸臣之卒必附列本傳以紀其始末而明代實錄則廢此例故竝補修之其書郭子興諸子之死及書靖難諸臣之事皆略無忌諱又如紀明初有通曉四書等科皆明史選舉志及明會典所未載韓文劾劉瑾事有太監徐智等數人爲之內應亦史傳所未詳頗足以資考證然各傳中多引寓圃雜記及瑣綴錄諸書皆稗官小說未可徵信又或自序事或僅列

舊文標其書目於體裁亦乖所附李贄評語尤多  
妄誕不足據爲定論也

四侯傳四卷

江蘇巡撫  
採進本

明王士騏撰士騏有馭倭錄已著錄是編摭文成  
侯張良忠武侯諸葛亮武侯王猛鄴侯李泌四人  
行事以正史及稗官野乘相參而成蓋隱寓尚友  
之意

歷代內侍考十卷

兩淮鹽政  
採進本

明毛一公撰一公字震卿遂安人萬歷己丑進士

官至給事中其書取古來闈寺事蹟輯爲一編自  
春秋及宋以時代次之各序其善惡而加以論斷  
大旨褒少而貶多一公天啟末蘇州巡撫一鷺之  
兄也一鷺黨魏忠賢事具明史其兄此書儻亦有  
爲而作乎

友于小傳二卷

兵部侍郎紀  
昫家藏本

明紀廷相撰廷相字柱石獻縣諸生是書成於萬  
歷甲申前有自序稱孝友皆天性而人情日薄往  
往知愛其親而不推其愛於兄弟故撫拾舊迹以



感發其彝良不錄帝王之事分位殊也不錄聖賢  
之事亦不錄奇行異節舍生蹈義之事不強以所  
不能也分二卷上曰循常下曰處變皆士庶人家  
庭細務未有其子堯卿跋稱族有閱牆者託詞避  
暑借其書室日日揮汗錄此編竟愧而復睦云

明十六種小傳四卷

浙江巡撫  
採進本

明江盈科撰盈科字進之號綠蘿山人湖廣桃源  
人萬歷壬辰進士官至四川提學副使是書採輯  
明代軼事分四綱十六日一日四維分忠孝廉節

四目二曰四常分慈寬明慎四目三曰四奇分隱  
怪機俠四目四曰四凶分姦諂貪酷四目大抵委  
巷之談自序曰因閱國乘摘出三百餘年新異事  
者妄也如方孝儒之滅族由殺蛇之報國史安有  
是事哉其分配諸目如薛瑄入節類于謙入廉類  
姚廣孝姊入隱類亦往往無義例也

夥壤封疆錄一卷

江蘇巡撫  
採進本

明魏應嘉撰應嘉興化人萬歷戊戌進士官至兵  
部左侍郎是書前有應嘉自序稱取劉方壺所臚  
列未盡者具名於左皆天啟中諸臣之不附魏忠

欽定四庫全書總目卷六十二

史部 傳記類存目四

十四

賢者也其詞狂謬之甚所列執政一人司禮大瑞  
一人部堂五人卿寺三人翰林七人臺諫十六人  
部署二人書後有跋不知何人所作詆應嘉爲京  
十惇確然應嘉依附奄黨代爲搏噬觀其自序殆  
不知世有廉恥事實京十惇確之所不爲者也

東林點將錄一卷

江蘇巡撫  
採進本

明王紹徽撰紹徽陝西咸甯人萬歷戊戌進士  
官至吏部尚書事蹟具明史闡黨傳其書以水滸  
傳晁蓋宋江等一百八人天罡地煞之名分配當  
時縉紳今本闕所配孔明樊瑞宋萬三人蓋後人

傳寫佚之卷末有跋稱甲子乙丑於毗陵見此錄  
傳爲鄒之麟作所列尚有沈應奎繆希雍二人與  
此本不同蓋其時門戶蔓延各以恩怨爲增損不  
足爲怪又稱許其孝陳保泰楊茂春郭鞏四人後  
列逆案不知何以廁名或作此書時四人尙未附  
忠賢耶閣若璩潛邸劄記亦有與王宏撰書曰頃  
聞點將錄果出貴鄉王紹徽手否先生以此書實  
出阮夫鐵王偶失闡歡謀所以解之術於阮阮援  
以此書而王上之而世遂以名之細思之殊不然

兒時讀點將錄記沒遮攔穆宏乃大鉞豈有自作  
此錄而竄入己姓名者云云則當時已傳聞異詞  
然崇禎欽定逆案以此錄屬之紹徽於時公論方  
明諒非誣蟻明史本傳亦以此書屬紹徽然則輾  
轉傳寫雖或有竄改其造謀之人要終不能以浮  
詞他說解也

東林籍貫一卷

江蘇巡撫  
採進本

不著撰人名氏所列北直八人南直四十一人浙  
江十一人江西十六人湖廣二十人河南七人福

建五人山東十三人山西十五人陝西十八人四  
川五人廣東雲南貴州各一人其北直郭鞏陝西  
薛貞後皆名麗逆案是又當考其究竟不當以一  
時之記錄爲斷矣

案此書及東林同志錄東林朋黨錄天鑒錄  
盜柄東林夥皆天啟中書其作者雖不可考  
要皆萬歷時舊人也今附諸魏應嘉王紹徽  
後從其類也

東林同志錄一卷

江蘇巡撫  
採進本

次定可重八書總目卷之二

史部 傳記類存目四

十六

不著撰人名氏題下註曰續點將錄所列政府韓  
曠以下六人詞林孫慎行以下十九人部院李三  
以下五十七人卿寺顧憲成以下七十三人臺  
省魏大中以下七十六人部曹王象春以下四十  
一人藩臬郡邑顧大章以下二十六人貲郎武弁  
山人吳養春以下二十一人

東林朋黨錄一卷

江蘇巡撫採進本

不著撰人名氏前載趙南星等九十四人後列東  
林脅從顧秉謙等五十三人各繫以科分籍貫座

主姓名而註以已處未處及在籍現任字考明史  
閹黨傳稱盧承欽餘姚人由中書舍人擢御史請  
以黨人姓名罪狀榜示海內魏忠賢大喜敕所司  
刊籍凡黨人已罪未罪者悉編名其中後承欽官  
至太僕寺少卿云云此書中已處字與所言已罪  
未罪相合其是時之官本歟

天監錄一卷

江蘇巡撫採進本

不著撰人名氏題下註曰真心為國不附東林橫  
被排斥以抑林野及冷局外轉者凡一百三人皆

魏忠賢之黨也

盜柄東林夥一卷

江蘇巡撫探進本

不著撰人名氏分初盛中晚四門詳列其姓名官爵而各註其罪狀詞極醜詆楊漣左光斗諸人名下已註斃獄字則此書成於天啟末年也

事編內篇六卷

江蘇巡撫探進本

明孫慎行撰慎行字聞斯武進人萬歷乙未進士官至禮部尚書諡文介事蹟具明史本傳是書採史傳中名臣事跡自公孫僑至王守仁凡十八人

隱逸六人以隱寓行藏之旨附以張瑋薛宗評語慎行自序云尚有外篇雜篇然檢其子士元所作凡例則但刊內篇其外篇雜篇未刊也

廉吏傳

無卷數浙江巡撫探進本

明黃汝亨撰汝亨有古奏議已著錄是書以宋費樞所作廉吏傳自春秋迄五季止百十有四人尚為闕略因搜採諸史五季以前增入三十三人又考宋元二史續載六十四人各以時代為序復以舊傳不分優劣乃定為三等於傳首姓名之上各

署上中下字以別之正編之外又有廉蠹一編所載爲郅都張湯等十人亦有評語姓名之上則署以酷譎陋忍贓姦諸字體例頗爲杜撰傳末附評一二語亦皆膚淺且汝亨旣因費樞舊本增輯成編自當以孰爲原書孰爲續補分別標識乃混而爲一但署己名尤不免於掠美矣

歷代名臣芳躅二卷

浙江巡撫  
採進本

明金汝諧撰汝諧字啟宸平湖人萬歷甲辰進士是編採摭前人事蹟自周秦以迄於明分忠貞節

義良吏恬退純孝友于範俗仁恕學術言行九類大抵詳於明人而略於前代挂漏已不待言且排比失倫品題多謬學術類以子貢師曠同稱殊嫌龐雜甚至以楊溥李東陽歸之節義一門溥固長者東陽亦不失文士然一則遷就於靖難革除之間一則依違於奄豎擅權之日日以節義豈足厭後世之心乎

聖學嫡派四卷

內府  
藏本

明過庭訓撰庭訓字成山平湖人萬歷甲辰進士

官至福建按察使擢應天府丞未及上而卒其書自漢董仲舒至明羅洪先所取纔三十六人各略錄其言行皆昭昭耳目無煩復爲表章者也

大臣譜十六卷

內府藏本

明范景文撰景文字夢章一字質公號思仁吳橋人萬歷癸丑進士官至東閣大學士殉流寇之難

國朝

賜諡文忠事蹟具明史本傳其書皆紀明代大臣內閣七卿各爲一卷起自洪武迄於泰昌皆用編年之體

而不分列傳凡例稱一憑實錄不置褒貶其銓除去就國史有佚者則採傳誌補之或人非大臣而章奏事與大臣相關者亦附見焉此本世罕流傳前後無序跋而有景文二私印中多墨筆添改之處蓋卽其家初印覆校之槁本也

宰相守令合宙十三卷

江蘇巡撫採進本

明吳伯與撰伯與字福生宣城人萬歷癸丑進士官至廣東按察司副使是書序文題曰宰相守令合宙而此本十三卷乃有宰相而無守令蓋非完

書矣所錄雖多採史傳而不免雜以稗官又刪節本傳往往遺其大而識其小體例殊爲冗瑣至於以李斯爲禮賢尙德而以趙高附斯傳尤爲乖舛又唐初不載裴寂劉文靜竇抗陳叔達諸人而先敘蕭瑀宋曹彬同平章事蓋沿唐五代使相之制實不預政乃列於眞宰相中亦爲失考也

毘陵人品記十卷

兩淮鹽政採進本

明吳亮撰亮字采干武進人吳中行之長子也萬歷辛丑進士官至大理寺少卿事蹟附見明史中

行傳是書因毛憲舊本而增修之自商迄明采摭頗富然十卷之中歷代居六而明乃居其四雖曰時近易詳亦少乖謹嚴之旨矣至於泰伯仲雍未免借材梁武子孫亦殊泛載皆未免地志之舊習也

名世編八卷

江蘇巡撫採進本

明吳亮撰初亮罷官歸田嘗輯古高隱事爲遯世編及再起又輯此編皆不採於史傳惟剽剗唐順之左編李贄藏書李廷機名臣記三書而成去取



絕無義例編次亦多顛倒如首列大禹乃帝王而非人臣以例推之何以刊除虞舜程嬰乃趙氏之臣魯仲連侯嬴乃平原信陵之客皆未登官籍以例推之此類何可勝收百里奚蹇叔列管仲前遽瑗列百里奚前屈原列遽瑗前九屬督亂而失次也

安危注四卷

兩江總督探進本

明吳甡編甡字鹿友南直隸興化人萬歷癸丑進士官至禮部尚書兼東閣大學士事蹟具明史本

傳是書輯漢晉唐宋將相之事用陸賈言天下安注意相天下危注意將之語以名其書意在諷時事也

明表忠記十卷

浙江巡撫探進本

明錢士升撰士升有周易揆己著錄是書載建文死難諸臣首列二親臣次殉難次死義次死事次死戰次從亡次隱遁次後死次三不忠次正論竝附載表忠祠碑記大旨堅主建文帝出亡之說非疑以傳疑之義也

壺天玉露四卷

浙江巡撫  
採進本

明錢陞撰陞字元履海鹽人萬歷戊午舉人其書亦費樞廉吏傳之流而兼收隱逸爲例小殊所載始於春秋終於明之萬歷所錄凡二百九十六人去取蹇駁頗無義例如解揚申包胥當以忠論尉遲敬德當以勇論莊周列禦寇當以隱論田基當以節論江上丈人侯嬴當以俠論趙括母當以識論西門豹當以術論概以廉稱未當其實又公孫宏之詐儉揚雄之失節華歆之佐逆濫與斯列亦殊混淆至

舟之僑介之推合爲一事則誤從說苑嚴君平嚴遵分爲二人則不攷後漢書九竦舛之顯然者也  
是書以壺天玉露爲名而序文題爲壺天玉露廉鑑每卷之首亦各別標廉鑑字豈壺天玉露乃其著書之總名廉鑑乃其一種歟末又附清士一卷自齧缺而下六十餘人各爲小傳而繫以詩卷端亦題壺天玉露字殆其中之又一種也

浙學宗傳

無卷數  
浙江  
巡撫採進本

明劉鱗長撰鱗長字孟龍號乾所晉江人萬歷己

未進士官至南京戶部郎中是編乃其爲浙江提學副使時所編以周汝登所輯聖學宗傳頗詳古哲略於今儒遂採自宋訖明兩浙諸儒錄其言行排纂成帙大旨以姚江爲主而援新安以入之故首列楊時次以朱子陸九淵竝列陳亮則附載於末題曰推豪別錄又以蔡懋德論學諸條及鱗長所自撰掃背圖諸篇綴於卷後懋德鱗長非浙人入之浙學已不類而自撰是書自稱劉乾所先生與古人一例尤於理未安也

榕陰新檢八卷

兩淮鹽政採進本

明徐勳撰勳初字惟起更字興公閩縣人聚書數萬卷竝手自丹黃以博洽名一時竟終於布衣明史文苑傳附見鄭善夫傳中茲編採摭古事分孝行忠義貞烈仁厚高隱方技名儒神仙八門所載多閩中事大旨表章其鄉人也

爲臣不易編

無卷數內府藏本

明黃廷鵠撰廷鵠爵里未詳據書前周延儒序稱與廷鵠定交此編卽夙昔所共討論則萬曆末人

也所錄古來名臣自皋陶至文天祥凡百人各爲之傳而系以序贊

令史高山集七卷

兩江總督採進本

舊本題曰臨川令江左吳用先體中編纂不著時代核其紙版乃明萬歷中式也其書輯古賢令事蹟以寓高山景行之意爲目十七爲事三百八十九有九皆不註所出之書其標目如循令廉令之類尙成文義如自清令薦舉令之類則拙鄙甚矣第一卷別名令譜而隸事與諸卷例同尤不可解

晉陵先賢傳二卷

浙江巡撫採進本

明歐陽東鳳編東鳳字千仞潛江人萬歷己丑進士官至常州府知府謝病歸起山西按察司副使又起南京太僕寺少卿竝不赴事蹟附見明史顧憲成傳是編取常州先哲寓賢自吳延陵季子訖明錢一本共六十九人採史傳郡志人各爲傳傳末各附以頌其傳於古人必詳所據之書於近人則率註其文爲某撰以明有據體例頗謹嚴然亦閒有不註者疑爲疎漏云

明詞林人物考十二卷

浙江巡撫  
採進本

明王兆雲撰兆雲字元楨麻城人是編錄明一代  
文士起於洪武迄萬歷仿昭明文選之例其人見  
在者不登每人各詳其事蹟與所著作凡四百二  
十三人又補遺四十四人共四百六十七人其敘  
述頗無法則如劉基一傳至二千言所記皆望氣  
占夢委巷流傳之事惟傳末附所著有劉誠意伯  
集一語竝所著犁眉公集亦漏載此自小說家言  
何關文苑又凌稚隆傳稱其纂輯五車韻瑞大為

詞林諸公所鑒賞亦未免濫美矣

弇州史料三十卷

左都御史張  
若淮家藏本

明董復表編復表字章甫華亭人是書皆採掇王  
世貞文集說部中有關朝野記載者哀合成書無  
所考正非集非史四庫中無類可歸約略近似姑  
存其目於傳記中實則古無此例也然世貞本不  
為史強尊為史實復表之意胡維霖墨池浪語稱  
弇州史料凡請弇州作傳誌者雖中材亦得附名  
未請傳誌雖蓋代勲名節義亦所不載後之耳食

未可以此爲定案云云是又誤以爲出世貞之意  
非其實矣

兩浙名賢錄五十四卷外錄八卷

浙江巡撫  
採進本

明徐象梅撰象梅字仲和錢塘人其書取兩浙先  
賢自唐虞迄明隆慶別爲二十二門又外錄元元  
空空二門以載釋道二家名目既多體遂冗雜如  
輔弼經濟無故區分文苑儒碩過加軒輊又諸傳  
皆標題官爵獨道學一門稱先生而不書其官於  
體例亦未畫一至所列之人本正史者十僅二三

本地志者乃十至六七以鄉閭粉飾之語依據成

書殆亦未盡核實矣

古今貞烈維風什四卷

兩淮馬裕  
家藏本

明許有穀撰有穀字子仁空輿人其書大旨爲表  
揚貞烈而作按輿志區分各以人繫其地由古迄  
明每地分列傳標題列名不標題二類其標題者  
各題七言絕句不標題者粗舉事蹟而已凡例稱  
詞雖淺俚意取勸揚是書長短有穀已自道之矣

忠義存衰什二卷

兩淮馬裕  
家藏本

欽定四庫全書

史部 傳記類存目四

三

明許有穀撰是書記建文殉難諸臣事蹟每一傳後繫七言絕句一首

續列女傳九卷

浙江鮑士恭家藏本

明邵正魁撰正魁字長孺休甯人是書以續劉向列女傳仍其體例分別七門唯其中節義賢明各分一子卷大抵採摭各史后妃列女傳分類彙敘閒有略益以他書者不過十之二三每傳未必引諸經爲詠嘆之詞以求肖向書之體可謂王之學華皆在形骸之外末附汪篈所作正魁母鄭氏傳

一篇尤古無此例也

逸民史二十二卷

內府藏本

明陳繼儒編繼儒有邵康節外紀已著錄是書雜採自周至元史傳郡志隱逸之士爲二十卷其末二卷以元史隱逸不詳搜取誌銘之類輯爲元史隱逸補然是書所載如張良兩龔之類皆策名登朝未嘗隱處者若吾邱衍王冕之類皆淹蹇不遇竝非高逸者亦濫入之未免擇之不精焉

東越文苑六卷

兩淮馬裕家藏本

欽定四庫全書總目卷十二

史部 傳記類存目四

三六

明陳鳴鶴撰鳴鶴字汝翔侯官人天崇閒諸生福建通志稱其早棄舉業與徐燧兄弟共攻聲律是編紀閩中文人行實起唐神龍迄明萬歷為四百十一篇唐五代五十人宋元三百八十五人明百有六人

姑蘇名賢小記二卷

兩淮馬裕家藏本

明文震孟撰震孟字文起長洲人天啟壬戌進士第一官至東閣大學士諡文肅事蹟具明史本傳是書大意以當世目吳人為輕柔浮靡而不知清

修苦節之士可為矜式者不少故擇長洲吳縣人物卓絕者各為之傳而系以贊首高啟終王敬臣凡五十人蓋既以表前賢又以勵後進也震孟以天啟二年及第而是書成於萬歷甲寅蓋其未遇時命意已如此其立朝清介有自來矣

崇禎閣臣行略一卷

浙江巡撫採進本

明陳盟撰盟號鶴灘富順人天啟壬戌進士官至吏部右侍郎兼翰林院學士加禮部尚書是編首列崇禎一朝五十閣臣年表次各為小傳據其載



及姜瓖叛逆李建泰伏誅之事則其書當成於桂  
王未滅時也所列小傳各有評斷而大抵深致憾  
於門戶夫明以門戶亡國其憾之是也然稱溫體  
仁小心謹誌兢兢自持既與門戶不協眈眈伺隙  
遂絕私交謝絕情面稱薛國觀之賜死士論冤之  
稱李建泰以人望薦舉督師無一貶詞顛倒是非  
至於如是其褒貶尙可信乎亦仍一門戶而已矣

王謝世家三十卷

江蘇巡撫  
採進本

明韓昌箕撰昌箕字仲弓烏程人是書成於天啟

壬戌考南朝王謝二家人物各爲之傳冠以譜系  
圖及同名考王氏分四派一曰瑯琊凡十四卷二  
曰太原正派凡四卷三曰太原支派凡二卷四曰  
太原別派凡二卷謝氏則惟陽夏一派皆止於六  
朝唐以後不預焉

名臣志鈔二十四卷

浙江巡撫  
採進本

明吳孝章撰孝章字平子嘉興人是書前有天啟  
癸亥吳中偉序謂其鈔鄧曉吾學編王世貞四部  
彙而稍節之然如孫一元傳乃殷雲霄所作則亦

不全據鄭王矣所錄始於洪武迄於隆慶凡一百五十三人卷中有自爲贊詞者如李善長傳末是也有襲弇州史彙者如湯信傳末是也然若劉基與李善長同卷而贊詞獨不及於劉馮勝傳友德藍玉同卷而贊詞獨不及於馮藍則未知命意之所存其所載事實頗爲闕略而徐達傳之附增壽李文忠傳之附景隆此自史家備詳世系之體若惟志名臣烏容及此至于謙傳之附石亨益無理矣中偉序全仿史記自序漢書敘傳之例行以韻

語殊乖體裁謂之不善學步可也

歷代相業軍功考二卷明代相業軍功考二卷浙江巡撫採進本

明沈夢熊撰夢熊字兆揚歸安人是書成於天啟癸亥所錄歷代相業自伊尹至陸秀夫四十七人軍功自呂望至孟珙五十人明代相業自楊士奇至申時行十三人軍功自徐達至王崇古三十人前載事實未附評語大抵節錄史文別無考證評語亦皆陳因之談

銀鹿春秋一卷

浙江巡撫  
採進本

明陸嘉穎撰嘉穎字子垂又字明吾嘉定人天啟中嘗官主簿是編輯古來義僕事蹟其以銀鹿爲名者銀鹿爲唐顏峴家僮事顏真卿終身至禍患不避去故也然奴不負主古來不止一銀鹿銀鹿亦不必爲義僕第一取以立石不甚可解殆以二字新穎故採爲標目耳殊無理也所列自爨布以下凡七人女奴十一人頗多漏略如蕭穎士僕人耳熟之事而遺之不載則無論他僻事也其中

有嘉穎裔孫鑽續補一十六條然雜列其間不可分別尤無義例所載史漢後劉武卽嘉穎家僕徐永清卽鑽家僕事皆不足傳而躋之古人之列亦不倫甚矣

孝友傳二十四卷

江蘇巡撫  
採進本

明郭凝之撰凝之字正中海甯人天啟甲子舉人官至兗東兵備副使是書採摭商至元末孝義事蹟按代編次然體例猥雜殊甚如君陳絕無事蹟以成王孝友一言列之猶有說也顏子竝不專以

孝稱而亦虛載其名晉文公對秦使乃舅犯之謀而亦浪標厥目至論語問孝四人以子夏為主子游附傳已屬妄分賓主孟懿子孟武伯亦與子游同附則不知二人之孝以何為據矣

明孝友傳八卷

浙江巡撫採進本

明郭凝之撰此書採摭明代之事以續所作孝友傳上自士大夫下迄沙彌乞旬人各為傳其四百二十九人

遜國忠記十八卷

浙江巡撫採進本

明周鏞撰鏞字仲馭金壇人崇禎戊辰進士官至刑部員外郎福王時為馬士英阮大鍼所殺事蹟附見明史姜曰廣傳是書統載建文死事諸臣而以職官分類體例小殊然篤信從亡之事於諸臣名姓備錄無遺又如錢士升表忠記載建文潛出西華門沿河得空舟而此載舟子夢高皇帝命艤舟以待更神其說矣

古今宗藩懿行考十卷

內府藏本

舊本題曰潞王編不著其名按明史諸王年表穆

宗隆慶五年封第四子翊鏐為潞王萬歷四十六年翊鏐庶子常滂襲封此書成於崇禎九年則當為常滂所輯也所採皆歷代宗臣之賢者自周迄明凡百餘人各著事蹟梗概加以評論中間如劉歆依附王莽傾覆宗邦而得與其數殊乖衮鉞之公又曹彰司馬孚等雖非無可節取而儼然與周召竝列亦擬不於倫矣

明經濟名臣傳四卷

江西巡撫採進本

明賀中男撰中男永新人是編載明代名臣自洪

武迄萬歷之季凡文臣五十五人武臣二十一人據其子善來所述凡例稱為未竟之本其挂漏猶為有說至於李東陽之固位取容張孚敬桂萼之希旨求媚其經濟安在而濫列於名臣不亦慎乎

宗聖譜十四卷

江蘇巡撫採進本

明鄒泉撰泉字子靜常熟人是書分八目曰孔聖譜曰四配譜曰十哲譜曰羣賢譜曰理學譜曰經儒譜曰史氏譜曰著作譜蓋欲合儒林道學源流本末彙為一書以便檢閱而體例叢脞編次多乖

如經儒譜內書傳列伏生歐陽夏侯不列孔安國而別列安國於儒拾遺之內史氏譜內列李燾續通鑑長編不列司馬光資治通鑑而別列通鑑於史拾遺之內進退失倫絕無義理其著作譜雜錄書名皆取材於經籍考中又十不存一蓋隨意鈔撮以供里塾佔畢之用雖以宗聖爲詞實兔園冊也

辨隱錄四卷

浙江汪啟淑家藏本

明趙鳳翀撰鳳翀字文舉爵里未詳自序稱十載

爲郎一麾出守蓋官至知府也此書爲歸田後所作列古人之隱居者分龍隱高隱知隱神隱石隱癡隱仕隱七門強生分別殊無義例高隱列張翥殆忘其屈節蔡京石隱列郭璞殆忘其見戮王敦癡隱以屈原雪菴和尚與焦光朱桃椎連名仕隱以胡廣譙周馮道與柳下惠同傳皆幾於黑白不分至李泌入龍隱張良又入神隱莊周入高隱列禦寇又入知隱亦不知其何以分優劣也

陸氏世史鈔六卷

浙江巡撫採進本

欽定四庫全書總目卷六十二

史部 傳記類存目四

三五

明陸澹源撰澹源平湖人自稱陸贄二十九世孫  
是書採陸氏名見正史者自漢迄元得一百二十  
人各錄其本傳哀爲一編亦自誦清芬之意然氏  
族源流最爲叢雜唐人世傳譜牒以門第相高而  
白居易自述姓源且不免以蹇叔之子指爲出自  
芊勝況自宋以來此學不講支分派別尤莫能稽  
澹源是書既首列唐書世系表明吳郡之陸出自  
田齊爲媯姓之後又引王應麟姓氏急就篇註謂  
出自陸終又引陳雷風俗傳謂出自陸渾之國是

本原先已傳疑又稱唐陸鴻漸姓由卜筮北魏步  
陸孤氏亦複姓省文是末派猶難考信乃取上下  
數千年中陸姓之人不問異同聯爲一譜然則尼  
山殷後可與孔圉稱宗懿仲齊卿可與國僑合族  
此亦千古譜牒之通病矣

衡門晤語六卷

兩江總督  
採進本

明潘京南撰京南自號壽櫟生新都人是編摘錄  
古今隱逸閒適之事分前後續別四集前集廣成  
子而下七十五人自上古逮魏後集孫登而下七

十五人自晉逮元續集伯成子高而下百五十人  
別集則摭其議論及所作詩賦亦皇甫謐高士傳  
之支流其曰晤語則千載一堂之意云爾

楚寶四十五卷

湖南巡撫  
採進本

明周聖楷撰聖楷字伯孔湘潭人是書編錄楚中  
人物名勝分二十五門曰大臣曰名臣曰大將曰  
智謀曰諫諍曰文苑曰良史曰命使曰典故曰真  
儒曰諸子曰孝友曰忠義曰獨行曰真隱曰列女  
曰方伎曰異人曰宦績曰遷寓曰山水曰名祀曰

列仙曰名釋曰祖燈悉錄史志原文亦閒有考證  
前有總論四條一曰定區域以尊王二曰別人物  
以徵傳三曰約論註以歸雅四曰考遺勝以闕疑  
高世泰序稱其人物十九名勝十一古文十九今  
文十一大致以人物為主而稍以山水古蹟附之  
既非傳記又非輿圖在志之中別爲一例姑從  
其多者爲主附之傳記類焉

道南錄五卷

江蘇巡撫  
採進本

不著撰人名氏亦無序跋道南書院在福州疑閩



人所爲也其書節錄明道程子楊時羅從彥李侗  
朱子言行末附祠祀始末道者公器傳道者亦統  
爲天下萬世之計不僅求爲一鄉一邑之榮況五  
大儒事蹟著述照耀古今亦不復藉此以顯是特  
夸耀桑梓非爲表章道學也所見亦云小矣

國殤紀略一卷

浙江巡撫  
探進本

不著撰人名氏以書中所自敘考之蓋郭姓湘鄉  
人前明崇禎丙子舉人也是編紀明末楚中死節  
之士前爲何騰蛟堵允錫章曠傳作霖四人遺事

各系以詩蓋用靖康小雅之體後附周克張世英  
王士璞何應瑞李有斐五人小傳允錫以病卒於  
軍不得援死綏之義士璞爲其弟士琳所構死於  
囹圄亦非克等四人死於張獻忠者比未免爲例  
不純也

欽定四庫全書總目卷六十二

番禺潘壽彭初校  
番禺陳慶修覆校

欽定四庫全書總目卷六十二

史部 傳記類存目四

三

<p> <small>此</small> </p>	<p> <small>一</small> </p>	<p> <small>二</small> </p>	<p> <small>三</small> </p>	<p> <small>四</small> </p>	<p> <small>五</small> </p>	<p> <small>六</small> </p>	<p> <small>七</small> </p>	<p> <small>八</small> </p>	<p> <small>九</small> </p>	<p> <small>十</small> </p>	<p> <small>十一</small> </p>	<p> <small>十二</small> </p>	<p> <small>十三</small> </p>	<p> <small>十四</small> </p>	<p> <small>十五</small> </p>	<p> <small>十六</small> </p>	<p> <small>十七</small> </p>	<p> <small>十八</small> </p>	<p> <small>十九</small> </p>	<p> <small>二十</small> </p>
---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	----------------------------	----------------------------	----------------------------	----------------------------	----------------------------	----------------------------	----------------------------	----------------------------	----------------------------	----------------------------

卷六